



# Акафист Рождеству Христову



## Кондак 1

Избранныи от всех племен и народов в язык свят, царское священство, сыны Света и Наследники Царствия – приидите, возрадуемся Господеви и Спасителю Богу, в Вифлееме нас ради пеленами повиваемому, с волхвы и пастыри поклонимся, Ангельскую вси в веселии поюще песнь: *«Слава в Вышних Богу и на земли мир, в человецех Благоволение».*

## Икос 1

Ангелом неведомую преславную тайну Твоего смотрения на конец веков открывая, Христе, яко Младенец, во убозем вертепе и яслех бессловесных миру являешися, Слове Божий Безначальне. Оле страшнаго таинства! Оле Божия снисхождения! Тем убо со страхом и радостию взирающе на неисповедимое истощание Твое, сице Тебе зовем:

Слава Тебе, Свете тихий, от Девы миру воссиявый.

Слава Тебе, Ангелов Радосте, в страну изгнания нашего пришедый.

Слава Тебе, Начальниче мира, спасение и мир погибельной земле благовестивый.

Слава Тебе, Сыне Божий, Себе Самого в залог прощения миру даровавый.

Слава Тебе, Сияние Отчия Славы, от смерти в Живот и от тьмы в чудный Твой Свет человеки призывавый.

Слава Тебе, Иисусе, снисшедый на землю и восход на Небо всем земнородным устроивый.

*Слава в Вышних Богу и на земли мир, в человецех Благоволение.*

## Кондақ 2

Видев нищету и погибель всего рода человеческого, Всемогущее Слово Твое, Господи, тихому молчанию содержащу вся, в нощи - в своем течении преполовляющейся, с Небеси, от Престолов Царских - в середину погибельных земли сниде во спасение поющих Ему: Аллилуйя.

## Иқос 2

Разумев духом пророк Аввакум пришествие Твое, ужасся вопияше: «Господи! Услышах слух Твой и убохся, разумех дела Твоя и ужасохся!» Мы же, сбытие тайны сия зряще, поклоняемся яслем и пеленам Твоим, зовуще:

Слава Тебе, Божия Премудросте и Сило, мглою повиваяй землю и облаками небо, нас ради пеленами повиваемый.

Слава Тебе, одеваяй красотой крины сельные и небо

украшивъ звездами, обнаженный ныне, да нашу наготу одеждою нетления и Славы облечеши.

Слава Тебе, ходяй по крилу ветреню и содержай рукою вся концы земли, пеленами связуемый, да свяжеша наша греховныя вожделения.

Слава Тебе, невместимый Небесами, в бессловесных яслех полагаемый, да нас от бессловесия избавиши.

*Слава в вышних Богу и на земли мир, в человецех Благоволение.*

### *Кондакъ 3*

Силы Небесныя Велиим гласом восхвалиша Тя, светлое Солнце Славы, восходящее от девственнаго облака и просвещающее мир за Милосердие многое и в веселии воспеша: Аллилуия.

### *Икос 3*

Имеяй Престол Небо и подножие землю, места ни одинаго обретаеши в обители, рожденный на земли: Чистая Дево, Мати Твоя, сокрывает Тя от мраза ношнаго в худем вертепе и в яслех скотиих полагает Тя, - Сокровище Горняго Мира и Зиждителя всяческих. Тем убо дивящися Милосердию Твоему, сице Тебе зовем:

Слава Тебе, весь по нам обнищавый, да нас обогатиши неизреченною Благодатию Твоею.

Слава Тебе, немощь нашу на Ся восприявый, да нас силою Твоею облечеши.

Слава Тебе, не возгнушавыйся взяти наша на Ся, да нам всего Себя отдаси.

Слава Тебе, мраз нощный претерпевый, да мир весь согрееши теплотою Твоея Любви.

Слава Тебе, преклонивый Небеса схождением Твоим,

и на земли не имевый, где главы подклонити.

Слава Тебе, вся труды и болезни понести благоволивый, да человека в Небесных Селениях упокоиши.

*Слава в Вышних Богу и на земли мир, в человецех Благоволение.*

#### Қондақ 4

Бурею сумнительных помышлений мятется Ирод и весь Иерусалим с ним, цари же восточнии Тебе, Царю царей, дары избранные приносят, с ними же и нас сподоби кланяться Тебе духом и Истиною и приносить Тебе: веру - яко злато, чистое житие - яко ливан, Любовь же - яко смирну, зовуще: Аллилуия.

#### Иқос 4

Слышав первозданный глас Тебе, Господа Славы, ходящаго в Раи, страхом скрися: убояся Лица Твоего; ныне же Ты сокрываеши, Спасе, страшную Славу Твоего Божества и нисходиши на землю, зрак Адамов нося, взыскати и спасти погибшаго, вопиюща Тебе:

Слава Тебе, Сыне Бога живаго, Сын Человеческий за Милосердие быти благоволивый.

Слава Тебе, долу нисшедый, да человека горе вознесеши.

Слава Тебе, наказание мое на Ся восприявый, и язвою Твоею мя исцеливый.

Слава Тебе, приобщивыйся моя плоти, да ми образ Божий возвратиши.

Слава Тебе, студную наготу первозданнаго ризою Твоя Славы покрывый.

Слава Тебе, вочеловечивыйся нас ради и существо земнородных обоживый.

*Слава в Вышних Богу и на земли мир, в человецех Благоволение.*

### Кондақ 5

Боготечная звезда с высоты показывает звездословцем Тебе, издавна предвозвещенную мысленную Звезду, от Иакова воссиявшую. Сподоби и нас узрети чистыми очесы души разумеваемую во убозем вертепе, яснее паче звезд и солнца просиявшую Славу Твоего Божества и воспети Тебе: Аллилуия.

### Иқос 5

Провидев издалече день Твой, Христе, праотец Твой Авраам возрадовался духом; мы же видяще Тя, Света Невечерняго, на объятях Девы, Матере Твоея, яко на престоле почивающа, радостно сретаем Тя пении сими:

Слава Тебе, носяй всяческая Силою Твоею, руками Девы - Отроковицы носимый.

Слава Тебе, млеко питаемый, манием питающий всякое дыхание и тварь.

Слава Тебе, Сыне Девы, Отроча младо, Бог Превечный, Отец будущего века сый.

Слава Тебе, на плещу Херувимов носимый, нас ради на руку Девичу почивающий.

Слава Тебе, Младенствуяй на земли, да нас чады Божия соделаеши.

Слава Тебе, безмерно Себе умаливый, яко да мя паче слова возвеличиши истощанием Твоим.

*Слава в Вышних Богу и на земли мир, в человецех Благоволение.*

### Кондақ 6

Проповедует миру Милостивное Твое пришествие

пророк Илия Фесвитянин; тому бо на Хоривстей горе явил еси тихое Сияние Твоея Славы: не бо в буре, огне и трусе, но во глаسه хлада тонка сошел еси на землю, Господи, просвящая и спасая вся зовущия: Аллилуия.

### *Иқос 6*

Воссия иногда Свет Небесный пастырем Вифлеемским, совершающим стражу нощную о стаде своем, тем убо ныне в нощи сего жития лености сон отрясем в молитве бдяще, да с пастырьми зрителие Славы Спаса рождшагося явимся и тако Ему воззовем:

Слава Тебе, Хлеб Животный, всех души питающий и глада смертнаго мир избавляющий.

Слава Тебе, Грозде Божественный, вино новое источающий и жажды греховныя землю изымающий.

Слава Тебе, Источнице Бессмертия, грядый даровати миру Воду Животную, от нея же вси пиющии не вжаждутся во веки.

Слава Тебе, светлое Солнце Правды, Светом Истины и теплотою Духа оледеневшую землю согреваяй.

Слава Тебе, Небесный Дождю, орошающий лице земли и весну Благодати дарующий естеству человеческому.

Слава Тебе, девственный Цвете, от корене Иесеова, землю цветами яко Бог украшаяй и мир весь облагодухавый прозябением Твоим.

*Слава в Вышних Богу и на земли мир, в человецех Благоволение.*

### *Қондақ 7*

Хотя исправить гордыню первозданнаго, смирил еси Себе Самаго, Слове Божий, до яслей и смерти Крестной,

нам образ дая, да вси, обращающие сердца к Тебе, облечутся в Царское одеяние Смирения Твоего и воцарятся над страстями и демонами, Тебе, Победителю всяческих, зовуще: Аллилуия.

### *Икос 7*

Дивную тайну воплощения Божественного и Христа смирившагося воспевающе днесь – приидите возвысимся от долеретных страстей и Чистою мыслию приступим и прикоснемся Младенцу, в яслех лежащему и глубину сердец очищающему, во умилении зовуще:

Слава Тебе, рождшийся на земли и Рождеством Твоим Божественное возрождение миру даровавый.

Слава Тебе, написавыйся повелением кесаревым с рабы, да наши имена напишеша на Небеси.

Слава Тебе, Создателю вся твари, Ему же горе служат тысячи и тьмы Ангелов, послужити пришедый всеродному Адаму.

Слава Тебе, Небо с землею и Бога с человеки примиривый в Рождестве Твоем.

Слава Тебе, Радость Вечную и всякий дар свыше – от Отца Светов в юдоль плача с Собою принесый.

Слава Тебе, пеленами Твоими человека в Любовь с Богом неразлучно связавый.

*Слава в Вышних Богу и на земли мир, в человецех Благоволение.*

### *Кондак 8*

Странна и Пришельца видяща нас ради Бога на земли, устранимся суетнаго мира и Небесное наше Отечество взыщем; Славу вечнующую, Веселие нетленное, Свет Невечерний и вся, яже дарова Сын Божий при-

шельствующим на земли и Любовию поющим Ему: Аллилуия.

### *Иқос 8*

Весь был еси горе на Престоле и доле во яслех, Непостижиме Господи, егда Ангели воспеваху Тя, яко Превечнаго Бога, человецы же зряху Младенца повита, лежаща в яслех; Ему же, яко миро, принесем слезы умиления, сице глаголюще:

Слава Тебе, Непрístupную Славу Твоего Божества сокрывый, да грешным приступен будеши.

Слава Тебе, Царю мира, бурю страстей наших и болезней умирить пришедый.

Слава Тебе, Источнице Чистоты и Святыни, пред Ним же нечисты светлейшия звезды небесныя, с мытари и грешники вечерявый.

Слава Тебе, блудницу и разбойника не отринувый и Света Твоего причастники оных показавый.

Слава Тебе, вся от покаяния к Тебе пришедшия - в лики друзей Твоих вчинивый.

*Слава в Вышних Богу и на земли мир, в человецех Благоволение.*

### *Кондақ 9*

Все богатство Любви Твоея удивил еси на ны, Иисусе Всецарю, егда Себе Самаго, яко Младенца, грешному миру в очищение даровал еси. Сего ради роды родов, спасеннии явлением Твоим, во веки благодарственно зовут Ти: Аллилуия.

### *Иқос 9*

Ветии многовещаннии недоумеют воспети чудеса Твоя. Кий бо язык человеческий и Ангельский возгла-



голет бездну Милости Твоя, Спасе; Приими убо благодарный плач земнородных, искупленных Твоею Кровию, Тебе припадающих и вопиющих:

Слава Тебе, странно во Своя пришедый, устраннышагося от Бога на Небо призываяй.

Слава Тебе, вертеп - обителю Себе сотворивый, да нам Небесныя Обители уготовиши.

Слава Тебе, в вертеп вселивыйся, да ны - вертеп разбойников бывших - храм Твой покажеш.

Слава Тебе, грех мира взямаяй и немощи человеческия исцеляяй.

Слава Тебе, труждающиеся и обремененныя к Себе призываяй и упокоеваяй.

*Слава в Вышних Богу и на земли мир, в человецех Благоволение.*

### Кондақ 10

Спасение соделал еси миру страшным истощанием Своим, врата бо Милосердия Божия и Вышняго Царства отверзла еси сошествием Твоим; отныне бо сыны человеческия общники Ангелов бывают и, радуяся, легкоходною стезею к Небеси восходят, немолчно зовуще: Аллилуия.

### Иқос 10

Царю Небесный, рожденный на земли человека ради, Христе Боже! Покажи ны достойны Твоего осияния, даждь нам во вся дни живота нашего поминати Твоя благодеяния и Чистым сердцем воспевати Тебе сицевая:

Слава Тебе, Царю веков, Вышнее Царство верным отверзающий и иже в нас царствующий грех конечно истребляющий.

Слава Тебе, Пастырю Добрый, заблудших овец от пустынных холмов на пажить цветотворную призывающий.

Слава Тебе, Ключу Божественный, Едине ведый отверзати сердца человеческия к приятию Благодати.

Слава Тебе, Иисусе Боже, новый Израиль в землю обетованную вводящий.

*Слава в Вышних Богу и на земли мир, в человецех Благоволение.*

### *Кондак 11*

Песнь благодарения приими от нас, Слове Божий, и сподоби нас, дольних, срести чистыми деяньми и подъяти духом Тебе – Христа, плотию Младенствующа – Христа, волею обнищавша – Христа – нас ради на землю нисшедша, Его же горе поют непрестанно Ангели Божии, зовуще: Аллилуия.

### *Икос 11*

Одеяйся Светом, яко ризою, – бессловен и наг в мир сей входит Божие Слово, носящи вся глаголом Силы Своея, немотствующим Младенцем зрится на земли, Ему же поклоняющесея вси глаголем:

Слава Тебе, немотствуяй на земли, да нас молчанию и хранению дара слова научиши.

Слава Тебе, Животе повитый в погребение, пленницы смертныя разрешити грядый.

Слава Тебе, Агнче Божий, на заклание в мир пришедый и смертию плоти Твоя жизнь Духа нам подающий.

Слава Тебе, благовестити нищим пришедый, исцелити сокрушенныя сердцем.

Слава Тебе, проповедуяй слепым прозрение, пленным свободу, отпускаяй сокрушенныя во отраду.

Слава Тебе, суетную славу и красная мира сего презирати научаяй, и от любве земныя к Любви Божией всех возводяй.

*Слава в Вышних Богу и на земли мир, в человецех Благоволение.*

### Кондақ 12

Благодать спасительная явися всем человеком и всех избавление приспе: Славы бо Господь нисходит на землю Милости ради. Горы и холми, поля и дебри, человецы и Ангели - всякое дыхание и тварь, веселия Божественнаго исполняеми, воскликните в сретение Того: Аллилуия.

### Иқос 12

Поюще Велие Таинство Твоего вочеловечения, Господи, молим Тя, раби Твои: егда приидеши паки на землю с Силою и Славою мноною, помилуй и спаси всех чтущих еже от Девы неизреченное Твое Рождество и Любовьию зовущих Ти:

Слава Тебе, до земли и до глубин адовых снисшедый во взыскание падшаго человека.

Слава Тебе, всю Божественную Кровь Твою и все богаство Любви Твоея истощивый во спасение людей Твоих.

Слава Тебе, вся сокровища Благодати Твоея нам открывый и удобен путь к Небеси показавый.

Слава Тебе, Милостивно объятия Своя отверзаяй кающимся, аще и тьмами пред Тобою согрешаем.

Слава Тебе, водами Крещения естество человеческое убеливый и Божественными Тайнами сие обоживый.

Слава Тебе, по исходе от временного жития, Царство Твое, Славу и веселие Иерусалима Горняго на бесконечные веки в наследие человеком обещавай.

*Слава в Вышних Богу и на земли мир, в человецех Благоволение.*

### Кондақ 13

О, неисследимая, неизглаголанная бездно Любви и щедрот – Младенствуяй плотию Иисусе, прими приносимое Тебе сие убогое моление, и не возгнушайся внити и возлещи во яслех бессловесныя моя души. О, Свете мира! Просвети мя Сиянием Твоим, прииди и обитель у мене сотвори, да во веки пою Тебе: Аллилуия, Аллилуия, Аллилуия.

*(Этот кондақ читается трижды. Затем читается икос 1 «Ангелом неведомую преславную тайну» и кондақ 1 «Избраннии от всех племен и народов»)*



## МОЛИТВА

О, сладчайший Иисусе, Слове Божий, Девы Сыне! Тебе нас ради на земли являшагося вся тварь исповеда быти Творца и Владыку всяческих: волны морския подстилахуся под нозе – по морю Ти ходящу; умолкаху ветры – Твоим повелением; мертвии – словом Твоим, восставаху; солнце – Тебе умирающу, померче; земля – Тебе восстающу, потрясеса; Небо – Тебе восходящу, отверзеса. Тем убо ныне молим Тя, раби Твоя, Владыко: подстели под нозе Твоя – вся наша помышления и чувства сердечныя, запрети волнению страстей, восстави ны от смерти греховныя, сотвори, да пред Светом Любви Твоея померкнут для нас навсегда – вся славная и красная сего суетнаго мира, да потрясутся страхом Твоим души наша и отверзутся сердца к приятию Тебе, Невечернаго Света, просвещающаго всякаго человека грядущаго в мир. Сподоби ныне нас изыти Любвию в сретение Тебе, нисходящему на землю – нас ради, и в день исхода нашего – от временнаго сего жития – усрящи нас, восходящих от земли. Милосердием Твоим приими ны в Небесныя Твоя Селения, и сотвори причастники Славнаго Царствия Твоего, да со Ангелы и всеми святыми поем и славим Тя, Спаса душ наших, со Безначальным Твоим Отцем и с Пресвятым Духом, Единаго в Троице Бога, Его же славят солнце и луна, превозносит вся тварь, славословит род человеческий и немолчно горе воспевают Силы Небесныя в бесконечныя веки. АМИНЬ.